

no. 2

23

ADVERTISSEMENT
DE HENRY
LE GRAND:
A V ROY.

Sur les affaires de ce temps.]

MDC. XXIII.

ADVERTISSEMENT
DE HENRY LE GRAND
A V R O Y.

Sur les affaires de ce temps.

I'A Y receus avec vn contentement inexplicable, les nouuelles de vos victoires, dans les champs Elisiens, il y auoit long temps que ie gemissois du plus creux de ma poitrine, de voir la France le sejour de ma valeur, & la demeure ordinaire de mes plus ardants desirs, rauagee & oppressee de fonds en comble pour vne poinee de gens qui s'estoient voulu cantonner à la Holandoise, dans le sein de vostre Empire. l'escoutois avec regrets, les tristes plaintes, de tant de braues capitaines qui sont morts valeureusement en cet eschec pour vostre seruice, & ne me pouuois tenir de pleurer de voir les campagnes Françoises teintes & empourprees encor vn coup du sang de mes pauures sujets, ie ne pouuois entendre sans souspirer, tant de furieux combats, tant d'assauts violens & de sanglantes escarmouches ou vous vous precipitez vous mesmes, & ne se passoit

A ij

moment ou i'en'eusse crainte de vous voir
tomber en quelque danger: Mais en cecy
vos ennemis mesmes ont bien recogneu
que le Ciel fauorisoit vos entreprises, &
que les armes que vous aués leuees es-
toient iustes, aussi vous a-il donné ses plus
verdoyans Lauriers, pour ombrager à ia-
mais vostre gloire, & immortaliser ceste
conqueste.

Maintenant ie viens vous congratuler
de toutes ces victoires & vous cōiour au
milieu de tant de triomphes, & principa-
lement, de ce que vous aués donné la Paix
à vos sujets, en cecy vous aués autant ac-
quis de renommee, que parmy vos plus
grandes conquestes. Vous avez peu ap-
prendre de moy, combien la clémence
est recommandable à vn Roy, il faut que
cette vertu marche en parallele avec la
Justice, & qu'elle tempere son ardeur. Le
pardon gaigne le cœur d'un sujet: la cle-
mence le ramene au vray sentier de l'o-
beyssance, & le plus souuent on a par ami-
tié ce que la force ne peut emporter.

Il est tres-vray, que la guerre que vous
auiez entreprise estoit iuste, vos ennemis
auoit le tort: car de vouloir demembrer
mon Empire, desraciner les loix fondamē-
tales, sapper les constitutions, boulnier
les ordonnances, se mutiner & fermer

la porte à celuy de quy on tient la vie,
c'estoit trop entreprendre: Vn sujet pour
quelque pretexte qu'il puisse prendre, n'a
iamais le droit de se rebeller. Je sçay bien
que les Rebelles vous auoient donné iu-
ste tiltre de courroux, tant de cercles, as-
semblees & monopolles pratiques cou-
tre vostre commandement dans vostre
propre Royaume, tant de seditions, mou-
uemens, secretes menees & reuoltes fai-
te dans la France à vostre desceu, estoient
plus que suffisans de vous attirer de Paris
pour en prendre la vengeance, aussi ont
ils esprouué à leur dam, qu'il ne se faut
iamais souleuer contre son Prince, ils ont
peu remarquer que les diuinités des Cieux
sont contraires à ces mutineries, & que
s'ils ont eu de l'impudence, & de l'affron-
terie pour vous soustenir & pour se re-
beller, vous avez eu de la force & de la
puissance pour les renuerſer.

Mais puis que ce different est terminé
par vne heureuse paix: puis que la belle
Astree qui auoit pris la fuitte pour ne voir
tant de meurtre ny tant de carnage est en-
cor vn coup descenduë du Ciel, puis que
les Temples de Ianus sont fermez, & que
vous estes retourné triomphant parmy
tant de guerres intestines qui ont voulu
ruynér & sapper cet estat: Puis que Satur-

ne, comme la France espere, va faire re-
 naistre l'ancien Siecle d'or tant desiré, par
 mes bons seruiteurs: Puis que Pandore est
 allee espancher sa boitte venimeuse sur
 d'autre Prouince. Iouyſſez grand Prince,
 iouyſſez heureusement du repos que vos
 longs & penibles trauaux vous ont acquis
 iouyſſez du bon-heur qui vous a accom-
 pagné en vos voyages. Puisse aduenir que
 la Paix ne s'eslongne iamais de vostre liēt
 de Iustice. Face le Ciel, que vous prote-
 giez vos sujets sous vos Edicts avec tran-
 quillitez & concorde.

Ce sont les saincts desirs que ie fais
 pour vostre Royale grandeur, ce sont les
 souhaits dont vos sujets chargent les Au-
 tels de vostre gloire, ce sont les vœux qui
 s'appendent à vostre retour triomphant.
 La France vous benit de luy auoir donné
 la paix, vos sujets oppressez vous loüent
 & chantent vos triumphes parmy les plus
 angoisſeuses peines, & par ceste paix espe-
 rent de iouyr encor vn coup du repos
 qu'ils ont perdu par les guerres passees.

Mais cependant, puis que vostre Roy-
 aume est en concorde que tout est reunny
 à vostre Couronne, & que ceux qui s'e-
 stoient retiré de vostre obeyſſance, ont
 esté en fin contraincts de retourner à vo-
 stre misericorde, vous deuez maintenant

ietter les yeux sur vos voisins, voir s'ils ne font rien à vostre desaduantage, considerer leur maintien & preuoir leur projets, c'est vne maxime d'Estat qu'un Prince doit pratiquer.

Parcere subiectis & debellare superbos.

Si vn Roy fait la guerre & que son Martial courage le porte à suivre les armes, il doit appaiser tant qu'il peut les guerres ciuiles, & esteindre le brasier qui s'allume dans son propre pays: car le discord y est bien plus grand, les ruynes plus apparentes & les combats plus sanglants.

Vous sçaués quel l'enemy que i'aye iamais eu plus grand en teste c'est l'Espagnol, il est couuert, & ne se nourrit que d'embuche. La France pourra tesmoigner combien i'eus de peine à chasser ceste Hidre de mes terres, & à luy trancher ses ambicieuses testes, vous deuez ietter les yeux sur ses desportemens, & voir de loin les orages qu'il premedite. L'Espagnol ressemble proprement à la Gangrene, qui empiete tousiours & corrompt le mēbre ou il se iette, iusques là, que les ferremens les plus violens ne sont pas souuent capables de le faire reculler.

Voicy que tous les iours i'entens des plaintes qu'on me fait de cet ancien ennemy, on me rapporte qu'il enuahit & qu'il

empiette tous les iours sur vos voisins à vostre desaduantage & contre les traitez & accords faits par le passé, vous y deuez prendre garde & preuoir les machinatiōs & stratagenes de ceste ancienne ligue.

Il y a deux ans & plus, que pendant vos voyages contre les rebelles, il a choisi son temps & a pris l'occasion pour enuahir les Lignes, Grises & la Valtoline, vous vous pouuez bien souuenir du manquement de la parolle qu'on auoit donnee à Monsieur de Bassompierre, Ambassadeur en Espagne pour ce sujet, & que cōtre tous droits diuins & humains par ceste escapade, on vous veut boucher le chemin du Milanois & de l'Italie, ou vous pouuez avec Iustice pretendre de bons droicts. C'est vn poinct d'Estat, tout le Conseil d'Espagne ne butte qu'à agrandir leur Couronne au despens d'autrui, & sur les debris de toutes les autres Republicques & Monarchies, bastir les pretendus triumphes de leur grandeur: c'est là ou de tout temps ont visé toutes leurs pretensions, c'est ce que leurs courses, prattiques, guerres stratagêmes & batailles ont tousiours eū pour obiet. Ce qu'ils font, c'est de miner peu à peu, & non tout à coup (car cela sembleroit trop creu & indigeste) les Royaumes, de sacquerir la puissance souue-
raine

raine de toute la terre tout ce qu'ils ont enuahy de tout temps a esté ruyné de ceste façon, leur domination est tyrannique par apres, & quant vne fois ils sont entrés dans vn pays de conqueste, difficilement en peuuent-ils demordre, toutefois ils ont esprouué iadis en moy, qu'ils auoit affaire à vn rude guerrier, qui ne les a point laissé long temps iouir de leurs vaines pretensions & conquestes.

Vous deuez repasser par vostre memoire tous les inuentions dont ils ont vsé pour vous embrouiller en vostre Royaume, pendant qu'ils recherchoient ceste enuahissement.

Vous aués peu recognoistre toutes leurs ligues, leurs brigues, leurs conseils & monopolles, & par quelles voyes desaduantageuses à vostre Couronne, ils ont tasché d'empietter sur vos voisins; ils se sont premierement pretextés du manteau de Religion, pour faire trouuer bon au Pape l'enuahissement qu'ils desiroient faire de la Valtoline, & des Lignes Grises: Ce qu'ils executerent en fin par vn massacre general qu'ils firent au mois de Iuillet 1620. dans plusieurs Eglises desdites Provinces sans aucun respect de sexe ny d'age. Faisans donc voile sur ce fleuve de sang, ils serendent maistres absolus de ce

pays defastre, qui a itaisné en fuite la perte du Compté de Chiauerie & l'entiere oppression de l'ancienne liberté des Grisons, qui ont esté de tous costez enseuclis & enuironnez des troupes Espaignolles iusques à ce que par le moyen du Duc de Milan, ils ont esté contrainsts de s'asservir à leur obeyssance, & d'accoster toutes les loix qu'on leur a voulu prescrire, & ainsi on les a fait non seulement renoncer à la Valtoline, ains a plusieurs autres priuileges qu'ils ont eu de tout temps.

En tout cet enuahissement, il n'y a aucune Prouince plus interessée que la France, puis que par dessus toutes les autres Républiques & Monarchies, elle en a pris la deffence.

Sur ceste nouuelle (comme dit est) vous auez enuoyé vostre Ambassadeur à Madrid pour r'accorder & reunit ce demembrement, les articles y sont signez: mais on n'a rien obserué de tout ce qui y auoit esté arresté: Car premierement, il estoit porté, que toutes choses seroient remises en leur estat, & qu'il n'y auroit rien d'innoué, que les soldats tant d'une part que de l'autre, seroient congediés, excepté l'ordinaire garde.

2. Que les principaux Seigneurs de la Ligue Grise, donneroient vn pardon ge-

neral aux traistres & rebelles qui auoient fait soussleuer la Valtoline & plusieurs autres particularités qui auoient esté concludues & arrestees dont l'effet ne s'en est ensuiuy: car au lieu de le faire executer, le Gouverneur de Milan par des pratiques secrettes qu'il auoit avec l'Archiduc Leopold coniuira leur totale ruyne, lequel de son costé a tasché à renuerser tout le pays.

Plusieurs demanderont dequoy il importe à la France, que les Lignes des Grisons ou que la Valtoline, soit en la domination de l'Espagne: mais s'ils prennent garde aux profits & aux aduantages qu'elle en peut tirer contre la France, ils verront que ce n'est pas sans raison qu'ils usurpent le pays. Ioint que l'Archiduc Leopold ny le Gouverneur de Milan n'eussent faits de si grands efforts pour le subjuguer tout à fait.

Premierement, vous sçauiez que la Duché de Milan vous appartient de droict de succession aussi bien que le Royaume de Naples, & qu'on ne peut vous en empescher la domination qu'en forçant les loix fondamentalles des Republicques. Or est-il, qu'ayant ce droict sur lesdites Prouinces & villes qui sont maintenant sous la domination des Espagnols, vous

pouuez quant bon vous semblera repeter ce droit, & redemander iustement ce qu'il vous appartient, pourquoy mettre à chef, il en faut venir aux mains: Qui est. ce maintenant qui ne iuge à l'œil, que le passage vous estant bouché, la conqueste vous en sera difficile, & que tout estant fermé du costé de la France, vous ne pouuez estendre vos confins plus loin, ny dilater vostre Royaume? C'est en quoy ont songé vos ennemis cependant que vous estiez empesché à desbrouiller par vostre presence le chaos qui se formoit dans l'estenduë de vos Prouinces, c'est en quoy ils ont témoigné combien ils aimoient le remuement & l'innouatiō, ça esté de tout temps vne des craintes de l'Espagnol, que vous ne prissiez les armes, pour reprendre ce qu'on vous enuahit dans l'Italie. Voicy vne autre consideration qui vous doit mouuoir à apporter à ceste playe vn prompt secours, & de remedier au plustost à ceste gangrene qui gaigne insensiblement dans vos Estats. C'est que les Espaignols ont fait ce qu'ils ont peu pour posseder toutes les Alpes, & de tenir toutes les aduenües, afin de vous empescher, non seulement d'entrer en l'Italie: mais aussi de prester secours aux Venitiens de qui la puissance les incommode fort, & qui les soustien-

dront iusques au dernier soupir: Or vous pouuez assez iuger combien est preindiciaable à vn Roy puissant en armes, renommé en vertu, & redouté par tout le monde, comme vous estes, d'auoir ses passages fermez & non les aduenues libres pour aller dedans & dehors son Royaume ou le droit de sa cause le peut appeller.

A tout cecy, il faut que i'adiouste les calamitez & les malheurs ou se sont veu plonger les pauvres Grisons despuis deux ans & demy qu'ils ont resenty les desastres de cet enuahissement, il n'y a celuy dans vostre Cour qui ne le sçache, & toutesfois personne n'en parle à vostre Majesté. Il est impossible de vous declarer les cruautez, les tirannies, les raptz & sacrileges qu'on y a commis, ce sont des malheurs vniuersels, qu'on ne peut expliquer ny de bouche, ny de cœur, c'est assez, que pour dire tous les maux qui s'y sont faits & perpetrez, que ce sont les Espagnols qui y sont passez: car vous disant cecy: c'est dire toutes les tirannies qu'on se peut imaginer au monde.

Orestans les Couronnes de France & d'Espagne, les deux equilibres de la Chrestenté, il n'y a point de doute, qu'à mesure que l'Espagne dilate ses confins & qu'elle accroît par ses vsurpations journalie-

res, les estenduës de sa grandeur que la France en diminue d'autant, & tombe, non seulement en vn mespris odieux: mais mesme en tel estat, qu'elle ne se pourra d'ores-nauant tenir assuree dans ses limites. La France, dis-ie, qui au siecles passez estoit en reputation d'estre l'arbitre de l'Italie, l'ayant par fois desliuree avec de tres-puissantes armées, par fois avec l'apprehension, retiree de l'enuahissement que ses ennemis en minutoient, & combien que ce Royaume soit de tout temps demeuré protecteur des Grisons, par le moyen de ses alliances, ça esté neantmoins sans aucune usurpation tyrannique ou apparence d'abus au dommage d'autrui, au lieu que L'Espagnol & la maison d'Autriche, qui du costé de Milan & de Tirol, affectent la plaine & entiere domination de ce pays, pour leur propre interest & au grand preiudice des autres Prouinces & Estats voisins, qu'ils tiendront, tant en Allemagne qu'Italie bloquez & reserrez.

Je vous laisse donc à iuger & à tous bons François, s'il est raisonnable de permettre cet enuahissement sans prendre les armes & affranchir ceste pauvre nation de ce coup qui l'a terracee tout à fait.

L'honneur & la reputation de la France y demeurent specialement engagez, puis

qu'on leur a promis à Madrid de restituer la Valtoline, & de remettre le tout en son premier estat, ce que tant s'en faut qu'on ait effectué, qu'au contraire, on s'est empiété de tout le reste du pays au grand mespris de la parolle qu'on auoit donnée.

En fin, pour conclurre ce present aduertissement (Grand Prince) Souuenez vous de mes anciennes confederations, & de la protection que vous avez prise de tous ces pays, vous ne scauriez trouuer occasion plus belle pour faire preuue de la martialle ardeur qui bout en vostre ame qu'en ceste rencontre il y va de l'honneur de la France, le sang espandu de tant de pauvres esclauues qui sont maintenant reduits sous la domination de l'Espagne, vous demande Iustice, & crie vengeance deuant vous, leurs regrets & leurs plaintes qui s'eslacent iusques aux Astres vous doiuent esmouuoir à prendre leur deffence contre ces nouveaux enuahisseurs, vostre propre interest y est couché. C'est vostre cause, ce faisant, le renom que vous vous estes desia acquis par le los de vos armes glorieuses triôpherôt de la mort & du destin, vos voisins vous craindront, vos peuples vous reuereront, les nations esloignees vous applaudiront comme au plus grand & redouté Monarque de la

terre, & outre tout cecy, les Grisons & autres pauvres esclaves qui respirent maintenant les derniers accez de leur vie sous vne si inique oppression & tyrannie, vous seront à iamais obligez, & tiendront à bon heur d'estre remis en leur premiere estre sous vos saincts & victorieux auspices. A cecy, ie vous coniure de par mes Manes propres, & par les prieres que vous en peut faire l'ombre de celuy qui vous a engendré: mon esprit reposera tousiours plus content quand i'auray veu effectuer ces miens aduertissemens.

F I N.